

四
部
備
要

中華書局輯刊

四部備要

第四冊

中華書局
影印
中國書店

本書據中華書局1936年版影印

四部備要

(第四二冊)

中華書局編

中華書局出版

(北京王府井大街36號)

中華書局影印發行
中國書店

北京新興膠印廠印刷

787×1092毫米 1:16 77·75印張

1989年3月第1版 1989年3月北京第一次印刷

印數 0001—500冊

(80)

續資治通鑑卷第一百九

賜進士及第兵部尚書兼都察院右都御史總督湖北湖南等處地方軍務兼理糧餉世襲二等輕車都尉畢沅編集

宋紀一百九起重光太端獻正

高宗受命中興全功至德聖神武文昭仁憲孝皇帝

紹興元年金天會九年春正月己亥朔帝在越州平旦率百官遙拜二帝於行宮北門外退御常朝殿朝參官起居自是朔望皆如之改元紹興德音降諸路雜犯死罪以下囚釋流以下羣盜限一月自首自新仍官令州縣存恤陳亡戰傷將士及奉使金國與取過軍前未還之家民戶今日已前倚閣稅租一切除放復賢良方正直言極諫科令有司條具元祐黨籍臣僚未經褒贈人吏刑部限一月檢舉自紹聖廢制科至是始因德音下禮官講求故事然未有應者金人掠天水縣徙治翰林承奉郎知縣事趙璧方受賀忽敵騎三百突入坐上縛璧及統領官雷震主簿張昔以去璧等不屈皆殺之己酉金人攻揚州金同中書門下平章事時立愛嘗在宗望軍中數年謀畫居多至是求解機務不聽癸丑以立愛爲侍中知樞密院事以張忠嗣爲資政殿大學士知三司使事丙辰初許百司每旬休沐宰執因奏事帝曰一日休務何害若無所施設雖窮夕何補也己未浙西安撫大使劉光世言自去臘至今招到女直及簽軍共六百六十餘人乞補官詔補忠訓郎已下至效用甲

頭內無姓人賜姓趙先是左監軍完顏昌屯海陵光世知其衆久戍思歸乃鑄金銀銅三色爲錢文曰招納信實皆有使押字以爲信號獲戎人之解事者貸而不殺俾密示儕輩有欲歸附者扣江執錢爲信而納之自是歸者不絕遂創立奇兵赤心兩軍辛酉詔曰朕念太祖皇帝創業垂統德被萬世神祖詔封子孫一人爲安定郡王世世勿絕乃至宣和之末以太常禮部各有所主依違不決使安定之封至今不舉朕甚憫之有司其上合襲封人名遵依故事施行是日輔臣進次帝因論此事曰太祖功德如此世襲王爵宜不爲過范宗尹曰太祖嘗云天下初定朕思得長君以撫之而授太宗則其意專爲天下帝又曰朕頃在藩邸入見淵聖皇帝率用家人禮一日論及金人事嘗奏曰京師甲士雖不少然皆游惰羸弱未嘗簡練敵人若來不敗即潰耳陛下宜少避其鋒以保萬全淵聖皇帝曰朕爲祖宗守宗廟社稷勢不可動其後敵復逼京師朕在相州得淵聖親筆謂悔不用卿言是時近習小人爭言用兵熒惑聖聽殊不量力遂至今日之旤癸亥監察御史韓璜言臣誤蒙使令將命湖外民間疾苦法當奏聞自江西至湖南無問郡縣與村落極目灰燼所至殘破十室九空詢其所以皆緣金人未到而潰散之兵先之金人既去而襲逐之師繼至官兵盜賊劫掠一同城市鄉村搜索殆徧盜賊既退瘡痍未蘇官吏不務安集而更加刻剝兵將所過縱暴而唯事誅求嗷嗷之聲比比皆是民心散畔不絕如系此臣所欲告於陛下者然道

中伏讀改元德音不覺感泣州縣情僞陛下既已盡知獨煩去苛恩意已備臣之餘忠欲陛下謹信詔令務在必行詔比降德音寬恤事件州縣自宜悉意奉行違者監察案劾御史臺察之是月金人以萬騎攻河南寄治所西碧潭時鎮撫使翟興以乏糧方散遣所部就食於諸邑所存惟親兵數千報至人情危懼興安坐自若徐遣驍將彭玘往授以方略設伏於井谷遇敵至陽爲奔北金人以精騎追之遇伏爲所擒餘衆潰去初順昌盜余勝等既作亂官吏皆散土軍陳望素喜禍與射士張資謀欲舉寨應之軍校范旺叱之曰吾等父母妻子皆取活於國今力不能討賊更助爲虐是無天地也兇黨忿剔其目而殺之暴屍於市旺妻馬氏聞之行且哭賊脅汗之不從又殺之賊既平屍迹在地隱隱不沒邑人驚異爲設香火事聞贈承信郎賜祠號忠節二月戊辰朔祝友以其軍降於劉光世初友在新店欲侵宣州阻水不克渡會光世遣人招之友留其使彌旬然後受招時江東路兵馬副鈐轄王冠在溧水駐軍友移書假道以趨鎮江冠不從友引兵擊之冠軍大敗友遂自句容之鎮江光世分其軍以友知楚州先是史康民在淮南與友合軍康民之軍極富以金寶賂光世光世喜康民遂得進用庚午改行宮禁衛所爲行在皇城司壬申初定每歲祭天地社稷如奏告之禮己卯日中有黑子四日乃沒辛巳禮部尚書兼侍讀秦檜參知政事（政事）建炎續錄作壬午今從宋史檜傳檜有贊檜啓曰盡室航海後還中州四方傳聞咸謂文下漢武節旌蓋落上得賜國祚入見乃拜拾遺未有如公獨參大政要錄云檜以爲議已始大怒之癸

未范宗尹言天象有變當避殿減膳今人情危懼之際恐不可以虛文搖動羣聽望陛下修德以消弭之臣等輔政無狀義當罷免帝曰日爲太陽人主之象豈關卿等惟在君臣同心行安人利物實事庶幾天變不致爲災也癸未詔以季秋大饗明堂江淮招討司隨軍轉運使詹至言大敵在前國勢不力請停大饗以其費佐軍仍督諸軍分道攻守以慰在天之靈繼志述事莫大於此甲申詔郡守在任改移並俟新官分符方得離任丙戌復秘書省仍詔監少不並置置丞郎著佐各一員校書郎正字各二員范宗尹嘗因奏事言無史官誠朝廷闕典繇是復置有崔紹祖者爲金人所掠自南京遁歸詐稱越王次子保信軍承宣使受上皇蠟詔爲天下兵馬大元帥興師取陷沒州郡是日至壽春府和州鎮撫使趙霖以聞詔文字不得奉行召皇姪赴行在（政事）續錄作紹祖七月丙午初赴行在紹祖九月乙卯因御史臺檢實移御史劾方紹祖今附見庚寅張浚奏本司都統制曲端自聞吳玠兵馬到郡坐擁重兵更不遣兵策應已責海州團練副使萬州安置詔依已行事理初浚自富平敗歸始思端及王庶之言可用庶時以朝議大夫持母喪居蜀乃併召之庶地近先至力陳撫秦保蜀之策勸浚收熙河秦鳳兵扼關隴以爲後圖浚不納求終制不許乃特授參議官浚徐念端與庶必不相容暨端至平道但復其官移恭州宣撫處置使司主管機宜文字楊斌素與庶厚知庶怨端深乃威言端反以求合又慮端復用謂端反有實跡者十又

言端客趙彬揭榜鳳州欲以兵迎之秦鳳副總管吳玠亦懼端嚴明譖端不已庶因言於浚曰端有反心久矣盍蚤圖之會蜀人多上書爲端訟冤浚亦畏其得衆心始有殺端意矣癸巳詔侍從臺諫條具保明弭盜遏敵患生國財之策翰林學士汪藻上駁將三說一曰示之以法二曰運之以權三曰別之以分大略謂諸將過失不可不治今陛下對大臣不過數刻而諸將皆得出入禁中是大臣見陛下有時而諸將無時也道路流傳遂謂陛下進退人材諸將與焉又廟堂者具瞻之地大臣爲天子立政事以令四方者也今諸將率驟謁徑至便衣密坐視大臣如僚友百端營求期於必得朝廷豈不自卑哉祖宗時三衙見大臣必執梃趨庭肅揖而退蓋等威之嚴乃足相制又遣將出師詔侍從集議者所以博衆人之見今則諸將在焉諸將聽命者也乃使之預謀彼既各售其說則利於公不利於私者必不以爲可行便於己不便於國者必不以爲可罷欲其冒鋒鏑趨死地難矣自今諸將當律以朝儀毋數燕見其至政事堂亦有祖宗故事且無使參議論之餘則分既正而可責其功是三說果行則足以馭諸將矣何難乎弭盜何憂乎遏敵哉若夫理財則民窮至骨臣願陛下毋以生財爲言也今國家所有不過數十州所謂生者必生於此數十州之民何以堪之惟通加裁損庶乎其可耳外之可損者軍中之冒請內之可損者禁中之泛取今軍中非戰士者率三分之一有詭名而請者則挾數人之名有使臣而請者則一使臣之俸兼十

戰士之費有借補而請者則便支廩祿與命官一同聞岳飛軍中如此者數百人州縣懼於憑陵莫敢呵詰其盜支之物可勝計哉臣竊觀禁中有時須索而戶部銀絹以萬計禮部度牒以百計者月有進焉人主用財須要有名而使有司與聞至於度牒則以虛名而權實利以濟軍興之用誠非小補幸無以方寸之紙捐以予人而不知惜也然臣復有私憂過計者自古以兵權屬人久未有不爲患者蓋予之至易收之至難不早圖之後悔無及國家以三衙官管兵而出兵必待密院之符祖宗於茲蓋有深意今諸將之驕樞密院已不能制臣恐賊平之後方勞聖慮自古偏霸之國提兵者未嘗乏人豈以四海之大而寥寥如此意偏裨之中必有英雄特爲二三大將抑之而不得伸爾謂宜精擇偏裨十餘人各授以兵數千直屬御前而不隸諸將合爲數萬以漸銷諸將之權此萬世計也是時諸將中劉光世尤橫故汪藻有是言藻書既傳諸將皆忿有令門下作論以詆文臣者其略曰今日誤國者皆文臣自蔡京壞亂紀綱王黼收復燕雲之後執政侍從以下持節則喪節守城則棄城建議者進講和之論奉使者持割地之說提兵勤王則潰散防河拒險則逃遁自金人深入中原蹂踐京東西淮南之地爲王城而棄地棄民誤國敗事者皆文臣也間有竭節死難當橫潰之衝者皆武臣也又其甚者張邦昌爲僞楚劉豫爲僞齊非文臣誰敢當之自此文武二途若冰炭之不合矣金人以舟載江浙所掠輜重自洪澤入淮至清河口假宣教

郎國秦卿在趙瓊水寨與瓊夜劫其舟得李稅所攜戶部尙書之印丙申復詔諸路提刑司類省試於是川陝宣撫處置使張浚始以便宜合川陝舉人卽置司類省試是月金人至德順軍經略使劉錫遁去金人以兵少不敢由秦亭聲言分三道而獨出沿邊以掠熙素多馬金人駐兵搜取無遺馬步軍副總管中亮大夫同州觀察使劉惟輔將遁去顧熙州尙有積粟恐敵因之以守急出悉焚之敵追及所部皆走惟輔與親信數百匿山中遣人詣夏國求附屬夏國不受其親信趙某詣金軍降金執惟輔誘之百方終不言怒梓以出惟輔奮首顧坐上客曰國家不負汝一旦遂附賊邪卽閉口不復言第六將韓青者間行從惟輔爲敵所得罵敵不降而死統制官重以熙河降知蘭州龔谷寨高子儒聞惟輔尙存固守以待及城破先刃其家而後死子儒狄道人也金人既略熙河地遂引歸李彥琪在古原州張中孚及其弟中彥導金人劫降之趙彬引敵圍慶陽守將楊可昇守不降五路破秦鳳經略使孫渥收本路兵保鳳州統領官關師古收熙河兵保鞏州於是金人盡得關中地改異李心傳云陝西全圖不見本月日熊克小紀建炎四年十一月末書之趙姓之遺史分見四年十一月紹興元年三月末書之蜀口用兵錄所書尤略攻張鈞鎮忠義錄無與元年三月九日金人大軍回自熙河至弓門寨鈞所書蓋據官無司案牘則盡失大路在二關陝之失也士大夫守節死義者甚衆隴州既失守朝請郎知州事劉化源不冒降敵使人守之不得死遂驅入河北販買蔬果隱民間者十年終不屈辱奉議郎通判原州米璞亦杜門謝病卒不受汚化源璞世家耀州西人皆敬之金人入

鳳翔秉義郎權知扶風縣康傑與敵將馮宣戰宣愛而欲招之傑奮曰吾當死於陳不能死於敵遂戰死忠翊郎知天興縣李伸爲金人所圍堅守不下城既破伸曰豈使敵殺我遂自殺時慶陽圍急成忠郎盧大受欲會合軍民收復邠寧二州解慶陽之圍爲人所告送寧州獄論死敦武郎秦州定西寨都監兼知寨鄭涓爲金人所攻袒臂而戰及城破自刺不死金人高其節亦弗害也是時守令城下者金人皆因而命之文林郎知彭陽縣李誥獨不降與其民移治境上金人令執之以獻欲官之凡三辭其後金人以爲歸附命爲儒林郎誥言於所司曰元係捕獲不敢受歸附之賞以其牒還之有武功大夫知環州安寨田敢者嘗得太祖御容欲間行南歸以獻事泄杖之死其後武功大夫秦鳳路兵馬都監劉宣以蠟書密遣人與吳玠相結且率金將任拱等以所部歸朝約日已定有告之者金人取宣縷臂之其家屬配曹州豫又升渭州爲平涼府去慶陽延安府名復舊州名卽以叛將張中孚守平涼府中彥守秦州趙彬守慶州慕容洵守環州三月丙午詔以京畿第二將兵千人隸神武中軍用統制官辛永宗請也於是中軍凡六千人金師還自熙河至弓門寨巡檢王琦禦之金立招降旗榜改阜昌年號衆皆拜琦獨不屈金知平涼府張中孚執而殺之庚戌江淮招討使張俊復筠州初俊引兵至豫章而李成在江州其將馬進在筠州皆不進俊喜曰我已得洪州破賊必矣乃復斂兵若無人者金鼓不動令將士登城者斬居月餘

進以大書文牒使來索戰。俊復細書答狀以驕之。又命神武前軍統制王瓊閱水軍於江中。賊勢方強。謂俊爲怯戰。俊諜知賊稍怠。乃議遣諸將分道擊賊。中部統制官楊沂中曰：「兵分則力弱。通泰鎮撫使岳飛請自爲先鋒。」沂中由上流徑絕生米渡。出賊不意。遇其鋒。擊破之。乘勝追奔。前一日至筠州。進出軍背筠河。先據要地。沂中語俊曰：「彼衆我寡。當以騎勝。願以騎見屬。」公率步兵當其前。沂中乃將騎數千與神武後軍統制陳思恭分爲兩道。同出山後。嚴陳以出。鏖擊至午。精騎自山馳下。賊駭亂退走。大敗之。俘獲八千。明日又戰。俊疑其復叛。令思恭夜殪之。進力不支。乃遁。俊隨復筠州。臨江軍馬進至南康。遇統制官巨師古失利。進復還江州。與成會。俊整兵追之。壬子。朝奉郎通判泰州馬尙就差知泰州。招諭軍民歸業。并興鹽場等事。先是張榮在通州。以地勢不利。乃引舟入縮頭湖。作水寨。以守。金右監軍昌在泰州。謀久駐之計。至是以舟師攻榮水寨。榮亦出數十舟載兵迎敵。望金人戰艦在前。榮惶遽欲退。不可。徐謂其衆曰：「無慮也。金人止有數艦。在前餘皆小舟。方水退隔淖。不能登岸。我捨舟而陸擊之。可盡。」遂棄舟登岸。大呼而殺之。金人不能騁舟中。自亂。溺水陷淖者不可勝計。昌收餘衆二千奔楚州。榮獲昌子塔佛寧。俘馘甚衆。榮自京東來。未嘗承王命。遂無路告捷。聞光世在鎮江。乃遣人願聽節制。且上其功。光世大喜。以榮知泰州。自渡江。國史散佚。至是衢州布衣何克忠獻太祖實錄。國朝寶訓。詔授下州文學。後八九年而

國書始備。甲子。始下詔罪狀李成。募有能斬首及獲成者。除節度使。賜銀萬兩。錢萬緡。且赦成軍中脅從者。初。馬進旣敗。江淮招討使張俊追之。至奉新樓子莊。賊將商元據草山設伏。俊熟視見山險路狹。乃遣步兵從間道直趨山頂。殺伏奪險。遂至江州。進拒戰。不勝。絕江而遁。乙丑。俊復江州。統制官楊沂中趙密引兵追擊。又大敗之。成復還蘄州。自是俊軍有鐵山之號。是月。金人自階州引兵侵文州。而江漲不得渡。遂還。因棄城去。武德大夫知岷州李惟德亦率官吏棄城來歸。惟德先守鄜州。城旣破。敵就用之。張浚復以爲右武大夫。榮州刺史。於是盡失陝西地。但餘階成岷鳳洮五郡。及鳳翔府之和尚原。隴州之方山原而已。時興元帥府草創倉廩乏絕。師旅寡弱。王庶撫教之。河東陝西潰師多舊部曲。往往來歸。不數月有衆二萬。己巳。參知政事秦檜言：「臣昨與何棗陳過庭孫傳張叔夜同扈二聖出疆。今臣偶獲生還。驟蒙聖獎。擢居政府。而棗過庭叔夜皆死異域。體骸不全。游魂無歸。可爲傷惻。欲望睿慈。特依近者聶昌體例。追贈棗等官職。仍給其家恩澤。以爲死事之勸。」詔贈棗過庭傳叔夜並開府儀同三司。官子孫各十人。癸酉。故承議郎刁翬贈直龍圖閣。先是。翬通判登州。會金人南侵。翬率兵迎敵。至黃山館與敵遇。軍敗。力戰身被七矢而死。至是言者論其忠。特錄之。甲戌。復政州爲龍州。劍川嘉祥雷鄉建城辰陽羅川盈川。泉江。枳縣。並復舊縣名。通會鎮復舊鎮名。以朝奉郎新通判建昌軍莊綽言。自大觀以後。避龍天萬

載等字更易州縣各不當也。丁丑刑部尚書權禮部尚書胡直孺等言參酌皇祐詔書將來請合祭昊天上帝皇地祇於明堂奉太祖太宗以配天庶幾禮專事簡從之。己卯金主詔曰新徙戍邊戶置於衣食有典質其親屬奴婢者官爲贖之戶計其口而有二三以官奴婢益之使戶爲四口又乏耕牛者給以官牛別委官勸督田作戍戶及邊軍資糧不繼糴粟於民而與賑恤其續遷戍戶在中路者姑止之卽其種藝俟畢穫而行及來春農時以至戍所庚辰隆祐皇太后崩於行宮之西殿年五十九帝自后不豫衣不解帶者連夕至是范宗尹等見帝於殿之後閣帝哀慟甚久諭宗尹等喪禮當從厚辛巳詔隆祐皇太后應行典禮並比擬欽聖憲肅皇后故事討論以聞朕以繼體之重當從重服癸未襄陽鎮撫使桑仲陷鄧州殺右武大夫淮康軍承宣使河東招捉使知汝州王俊初仲圍鄧州急守臣武功郎譚克遣人詣俊求援俊自繼蓋山引衆赴之克與飲燕俊醉克率衆突圍出奔遂入蜀仲攻城陷執俊歸襄陽磔之旣遂以其副都統制李橫知鄧州仲高密人嘗爲黃河埽兵以勇自負仲雖嗜殺然性頗孝或盛怒欲殺人其母戒之卽止每自稱桑仲本王官終當以死報國故能服其下焉甲申同知樞密院事李回爲攢宮總護使刑部尚書胡直孺爲橋道頓遞使神武右軍都統制韓世忠爲總管內侍楊公弼爲都監調三衙神武輜重越州卒千二百人穿復土故事園陵當置五使議者以遺誥云權宜擇地攢殯故第命

大臣一員總護乙酉輔臣拜表請帝爲隆祐服期從之丙戌以太后崩下詔恤刑遣官告天地社稷宗室并告諸侯丁亥宣撫處置使張浚殺賁授海州團練副使曲端於恭州端旣爲利夔制置使王庶所譖忠州防禦使知渭州吳玠亦憾之乃書曲端謀反四字于手心因侍浚立舉以示浚浚素知端庶不可竝立且方倚玠爲用恐玠不自安庶等知之卽言端嘗作詩題柱有指斥乘輿之意曰不向關中興事業卻來江上泛漁舟此其罪也浚乃送端恭州獄有武臣康隨者在鳳翔常以事忤端鞭其背百切骨憾端浚以隨提點夔州路刑獄端聞之曰吾其死矣呼天者數聲端有馬名鐵象日馳四百里至是連呼鐵象可惜者數聲乃赴逮旣至隨命獄吏繫維之鋤其口燬之以火端乾渴而死士大夫莫不惜之軍民亦皆悵恨浚以是大失西人之心是春金左副元帥宗翰使右都監耶律伊都將燕雲女直二萬騎攻西遼於和勒城調山西河北夫饋餉自雲中至和勒城經沙漠三千餘里民無一二得還始金人侵中原有擄掠無戰鬪計其從軍之費及回日所獲數倍自立劉豫之後南侵淮西侵蜀生還者少而得不償費人始患之故漠北之行民不勝其苦伊都之軍和勒也失其金牌宗翰疑伊都與西遼暗合遷其妻子於女直伊都始貳五月己亥手詔禮部太常寺討論隆祐皇太后合行冊禮及奏告天地宗廟等事初進士黃縱上書論隆祐皇太后頃年以誣謗廢斥未嘗昭雪雖復位號然未正典禮及冊告宗廟朝議欲因升

附廟庭特行冊禮帝諭大臣太后失位於紹聖之末其後欽聖復之再廢於崇寧之初雖事出大臣然天下不能尸曉或得以竊議兩朝范宗尹曰太后聖德人心所歸自陛下推崇位號海內莫不以爲當然前後廢斥實出章惇蔡京人皆知非二聖之過禮部員外郎王居正以謂國朝追冊母后皆由前日未極尊親之故隆祐皇太后蚤儼宸極雖蒙垢紹聖退處道宮而按元符三年五月詔書則上皇受命欽聖憲肅皇后以復冢婦之意亦已明甚崇寧初權臣擅政惇違典禮以卑廢尊是太后之隆名定位已正於元符而不在靖康變故之日也謂宜專用欽聖詔書及崇寧姦臣沮格之意奏告天地宗廟其冊禮不須討論議遂定 癸卯侍從臺諫集議隆祐皇太后諡曰昭慈獻烈后 甲辰帝始御正殿 江西安撫大使朱勝非奏內侍李肖隨劉紹先出戰功係第二等帝曰恐無此理肖安得有戰功毋庸行出懼貽笑四方張守曰不若但以傳宣之勞賞之 癸卯帝出大宋中興之寶及上皇所獲元圭以示輔臣寶上新刻者中書舍人洪擬轉對論帝王之學中敘董仲舒王吉之言末以章句書藝爲非帝王之事帝曰人欲明道見禮非學問不可惟能務學則知古今治亂成敗與夫君子小人善惡之迹善所當爲惡所當戒正心誠意率由於此范宗尹曰人主欲以此爲先務因奏仇士良告其徒之言帝然之 忠州防禦使秦鳳經略使吳玠及金人烏魯折合戰於和尚原之北敗之時金主之從姪沒立與烏魯折合以數萬騎分兩道西

侵沒立自鳳翔二將由階成約日會和尚原玠與其弟統領官武翼郎閣門宣贊舍人璘以散卒數千人駐原上朝問隔絕軍儲匱乏將士家屬往往留敵入無固志有謀劫玠兄弟北去者幕客陳遠猷夜入告玠遽召諸將勵以忠義敵血而誓諸將感泣爲備益力是日二將以勁騎先期而至陳於原北玠擊之四戰皆捷山谷中路狹而多石馬不能行敵棄馬遂敗去後三日沒立自攻箭箐關玠遣別將擊之二軍卒不得合又五日敵移寨黃牛嶺會大風雨雹翼日引去張浚錄其功承制玠爲明州觀察使璘爲武德大夫康州團練使賜金帶擢秦鳳路兵馬都鈐轄節制和尚原軍馬 丙午江東安撫大使司奏捕虔賊李敦仁獲捷 真揚鎮撫使郭仲威爲劉光世所執初仲威敵退乃以其將李懷忠知揚州而自往真州屯駐仲威與李成有舊聞在九江欲往從之時滁濠鎮撫使劉綱以所部屯建康之雨花臺仲威爲所扼不得進復還揚州謀據淮南以通劉豫光世知其反復遣前軍統制王德往捕之宣言游徼淮上至維揚仲威迎謁於摘星臺德手擒之遂并其衆詔斬仲威於平江市先是仲威焚掠平江邦人怨甚故就誅之 金分遣使者諸路勸農 丁未詔江淮州軍自今有金國南歸之人賣到二聖密詔文檄蠟彈之類未得奉行具奏聽旨違者重寘典憲先是僞造者衆故條約之 參知政事秦檜乞以昨任御史中丞致仕日本家奏補兄彬男熺恩澤文字毀抹更用建炎二年大禮恩例補兄彬文資從之熺王喚孽子也檜娶喚

女弟無子，喚妻鄭居中女，怙貴而妬。檜在北方，出燔以爲檜後。奏官之至，是其家以燔見檜，檜甚喜。庚申，福建制置使辛企宗奏順昌盜余勝就招。壬戌，范宗尹等以國用不足，奏驚通直修武郎已下官，帝曰：「不至人議論否？」張守曰：「祖宗時嘗有此，第止齋郎李回曰：『此猶愈於科斂百姓。』」帝曰：「然。」大凡施設，須可行於今，可傳於後，即善耳。宗尹乃退，其後遂止驚承直郎已下官。邵青受劉光世招安，太平州圍解。初，青既薄城下，與其徒單德忠、閻在等分寨四郊，開畎河水，盡滄圩岸，以斷援兵來路。調民伐木爲慢道，急緩者殺而并築之。一日之間，與城相平。賊攻具畢，施遂縱火焚樓櫓，剗孕婦取胎，以卜吉凶。敵樓爲砲所壞，守臣郭偉運土實之，賊不能近。偉方食於城上，青以砲擊其案，又以矢斃其侍吏。偉亦不顧，相持凡九日。偉募死士，乘夜下城，因風焚其慢道。又二日，決姑溪水以灌其營。青窮蹙，會光世遣使來招安，翼日青遂去。初，青之參議官魏曦多智，偉憚之，乃爲書以響箭射于城外，已而曦力勸青就招，青怒殺曦。人皆謂偉用間言，青信之也。癸亥，初馬進既爲江淮招討使，張俊所敗而李成猶在蘄州，至是俊引兵渡江，至黃梅縣，親與成戰，成據石幢坡，憑山以木石投人。俊乃先遣游卒進退，若爭險狀，以誤之。俊率衆攻險，賊徒奔潰，進爲追兵所殺，成去，以餘衆降僞齊。六月丙寅朔，詔自今朔望遙拜二聖于殿上，百官于殿下行禮。先是，帝與百官並拜於庭，而中書林適以爲非宜，請用家人禮，故有是旨。壬申，宰相范宗尹率

百官奉上昭慈獻烈皇后謚冊于太廟，實用銀塗金冊，以象簡，其文參知政事秦檜所撰也。時太廟神主寓温州，乃即大善寺大殿上設祖宗寓室行禮。丁丑，詔越州申嚴門禁，時有潰兵數百直入行在，越州泊于禹跡寺，闔城震駭。論者以爲言，乃命諸門增甲士守視，命官親書職位出入軍馬，自外至者悉屯於城外。戊寅，言者論朝廷暫駐江左，蓋非得已，當爲攘卻恢復之圖。頃歲駐蹕揚州，有兵數十萬，可以一戰而斥埃，不明金人奄至，卒以奔走踰江入越，此宰相黃潛善、汪伯彥之過也。前年移蹕建康，是時兵練將勇，食足財豐，據江上不測之險，當敵人疑懼之秋，可以守矣。而舟師不設，金人未至，先已奔走，運海而南。此呂頤浩之過也。往者不可諫，來者猶可追，陛下今歲戰守之策，安所從出？萬一事起倉猝，大臣復欲棄土地，遺人民，委府庫，脫身奔走，此豈安國家、定社稷之謀乎？臣愚以謂有江海則必資舟楫，戰守之具有險阻則必資郡縣，固守之力有兵將則必駕馭馴擾，不可爲將帥自衛之資，有財賦則必轉運灌輸，不可爲盜賊侵據之用，伏望委任大臣，早賜措畫。己卯，昭慈獻烈皇后靈駕發引，帝遣奠于行宮外門，參知政事張守撰哀冊，文禮畢，易吉服還內，百僚服初喪之服，詣五雲門外奉辭，退，易常服，詣常朝殿門外立班進名奉慰。故事，園陵用吉凶儀仗五千三十一人，至是太常請權用五百四十四人。初，總護使李回既受命，有司猶援園陵之制，辟官分局，費用頗廣。寶文閣待制陳戢時爲給事中，上疏論列，以爲異日歸

祔泰陵復用何禮至謂會稽之山不可採而欲取他山之石廟禁之卒不足用而欲調諸郡之夫並緣爲茲誇侈如此豈不違太后慈儉之遺訓乎是一切鐫省辛巳詔文林郎越州上虞縣丞婁宗亮赴行在以其言宗社大計也宗亮之書曰先正有言太祖捨其子而立弟此天下之大公也周王薨章聖取宗室子育之宮中此天下之大慮也仁宗皇帝感悟其說詔英宗入繼大統文子文孫宜君宜王遭罹變故不斷如帶今有天下者獨陛下一人而已恭惟陛下克己憂勤備嘗艱難春秋鼎盛自當則百斯男屬者椒寢未繁前星不耀孤立無助有識寒心天其或者深爲陛下追念祖宗仁心長慮之所及乎崇寧以來諛臣進說推濮王子孫以爲近屬餘皆謂之同姓致使昌陵以後寂寞無聞奔迸藍縷僅同民庶恐祀豐于昵仰達天監茲祖在上莫肯顧歆此二聖所以未有回鑾之期強敵所以未有悔禍之意中原所以未有息肩之時也欲望陛下於伯字行下遴選太祖諸孫有賢德者視秩親王使牧九州以待皇嗣之生退處藩服更加廣選宣祖太宗之裔材武可稱之人陞爲南班以備環列庶幾上慰在天之靈下係人心之望臣本書生白首選調垂二十年今將告歸不敢緘默位卑言高罪當萬死惟陛下幸赦疏入帝讀之大爲嘆寤壬午權攢昭慈獻烈皇后于會稽縣之上皇邨神園方百步下宮深一丈五寸明器止用鉛錫置都監巡檢各一員衛卒百人生日忌辰旦望節序排辦如天章閣之儀改寶山證慈禪院爲泰寧寺專奉

香火賜田十頃帝事昭慈皇后備極孝愛故園陵儀範率用母后臨朝之比焉癸未江淮招討使張俊以大軍至瑞昌縣之丁家洲初俊被密旨并收李允文悉其拒命乃與神武後軍統制陳思恭謀之思恭言允文兵尙衆須以計取會英州編管人汪若海自江東赴貶行至撫州允文以書招之招討使參議官湯東野因引若海謁俊俊曰君與李節制善盍往說之與俱來免盛夏提師至鄂若海曰與來而少保誅之則若海爲賣友俊曰以百口保之若海先以書與允文曰張少保既破李成欲移兵指武昌若海言君無反狀其屬曰節制非朝命且殺袁植與留四川綱運非反而何惟少保言以百口相保今有三說劉豫新立君能引張用之衆擒豫以取重賞一也或引衆西投宣撫司張樞密既相辟必爲君白于朝二也信少保百口相保之言三也君勿恃張用之徒爲強彼見李成既破皆已喪魄若知朝廷怒君必回戈相逐矣允文感悟乃舉其軍東下俊因檄若海併招新除舒蘄鎮撫使張用時用自咸寧縣引兵趨分寧爲通泰鎮撫使岳飛所逼逐會俊于丁家洲俊併將二軍遣統制王緯護允文及參謀官滕膺赴行在甲申昭慈獻烈皇后神主還越州戊子帝諭大臣曰昨令廣選茲祖之後宗子二三歲者得四五人資相皆非岐疑且令歸家俟其至泉南選之先是尙書右僕射范宗尹有造膝之請帝曰茲祖以聖武定天下而子孫不得享之遭時多艱零落可閔朕若不取法仁宗爲天下計何以慰在天之靈同知樞密院事李回

曰自昔人君惟堯舜能以天下與賢惟堯祖不以大位私子聖明獨斷發於至誠陛下遠慮上合堯祖實可昭格天命帝曰此事亦不難行祇是道理所在朕止令於伯字行中選擇庶昭穆順序秦檜曰須擇宗室閨門有禮法者帝曰當如此簽書樞密院事富直柔曰宮中有可付託否帝曰朕已得之若不先擇宮嬪則可慮之事更多宗尹曰陛下審明審慮如此宗廟無疆之福帝所指宮嬪蓋張婕妤好吳才人也王明子伯卿七歲已下者十人入宮廣選十人中又選二人得阜陵及伯卿去才四十日恐選擇未必如此之速又令時以舊事譚議爲上所聽未以此初安南賊吳忠與其徒宋破壇劉洞犯軍城統制官張中彥李山屢舉兵討之不克是日江南提點刑獄公事蘇恪以從事郎田如鼇權南康縣丞令與朝奉大夫權通判魏彥杞往招捕未幾破壇爲彥杞所殺如鼇尋遣兵焚賊寨殺洞天壬辰金賜昏德公重昏侯時服各兩襲是夏金左副元帥宗翰右監軍希尹自雲中之白水泊右副元帥宗輔自燕山之望國崖避暑山西漢民賂宗翰執蓋者毒之宗翰幾死秋七月乙未朔劉光世以枯桔生穗爲瑞奏之帝曰歲豐人不乏食朝得賢輔佐軍中有十萬鐵騎乃可爲瑞此外不足信朕在藩邸時梁間有芝草府官皆欲上聞朕手自碎之不欲生此奇怪事輔臣數服庚子朝議大夫新知澧州吳革爲潼川府路轉運副使自置宣撫司後四州監司以敕除者始此詔通泰鎮撫使岳飛一軍權留洪州彈

壓盜賊以江淮招討使張俊將班師也遂以飛爲神武右副軍統制壬寅復置翰林天文局太史局學生五十人天文局十人丁未太尉兩浙西路安撫大使淮南揚楚等州宣撫使劉光世兼海泗安撫使時淮北之人歸附者甚衆故命光世安輯之殿中侍御史章誼言聞邵青自太平州乘船經由鎮江府江陰軍遂入平江之常熟縣所至劫掠劉光世以驍將銳兵而不能應時擒制以邵青所乘皆舟楫而光世皆平陸之兵故也國家既憑大江以爲險阻而於舟師略不經意今邵青小醜光世大帥乃敢越境深寇使賊有大于此者將何以禦之臣聞古兵法舟師有三等其舟之大者爲陳腳船其次爲戰船其小者爲傳令船蓋置陳尚持重故用大舟出戰尙輕捷故用其次至於江海波濤之間旗幟金鼓難以麾召進退故用小舟由此觀之凡舟之大小皆可以爲守戰之備不必皆用大舟然後濟也望於駐蹕之地置一水軍帥以名將計亦易辦詔淮南宣撫措置時青已移舟通州海門鎮而行在未知也己酉昭慈獻烈皇后虞主往温州太廟乙卯中書舍人林通轉對論金雖北去安知不示弱以怠我師候秋高馬肥遣李成招集瀕淮饑民呼吸羣盜侵軼江南徐遣勁騎由真揚福山擣虛浙右願乘此時聚衆積粟蒐將閱士以備防秋之計今日之弊在於舟不習戰將不用命財用殫匱民食艱鮮州縣以軍興爲名而倍取無度此適腹心之深病政事所當先而盜賊四裔尙爲病在四肢可以漸去也惟陛下與大臣汲汲講圖之

初五湖捕魚人夏寧聚其徒爲盜。後有衆千餘。專掠人以爲食。郭仲威嘗招之不應命。至是受劉光世招安。又有仲威餘黨出沒于淮南。亦受光世招安。皆令長蘆埃舟以濟。寧等無食。半月之間。復陷萬餘人。是日始具舟迎之。由是江北鄉邨愈覺凋殘矣。己未。昭慈獻烈皇后卒。哭。命左監門衛大將軍士豐卽內中。天章閣几筵前行卒哭之祭。帝不視事。百官進名奉慰。辛酉。召江東安撫大使兼知池州呂頤浩赴行在。欲代范宗尹也。是日。頤浩督諸將與張琪戰于饒州城外。大敗之。琪自徽州引兵犯饒州。衆號五萬。時頤浩自左蠡班師。帳下兵不滿萬。郡人大恐。頤浩遣統制官巨師古招降之。琪詐受招誘。師古入其營。遂薄城下。統制官右武大夫宣州觀察使閻皋。頤浩愛將也。方捕盜于宜黃。走檄呼之。會皋平盜而歸。星馳以赴。頤浩召諸統兵官姚端崔邦弼顏孝恭郝最等。駐軍城外。皆令聽皋節制。端軍爲左。邦弼軍爲右。皋將中軍。頤浩自畫陳圖授之。琪兵至近郊。前軍將張俊失利。琪恃其衆直犯中軍。皋力戰而端邦弼兩軍夾擊。遂大破之。追奔三十里。殺賊甚衆。賊又別遣水軍分道自景德鎮來犯。頤浩遣統領官張慶以崔增餘衆禦之。琪遁去。是夜其愛將姚興以所部詣巨師古降。琪遂走浮梁縣。復還徽州。癸亥。尙書右僕射同中書門下平章事兼知樞密院事范宗尹充觀文殿學士。提舉臨安府洞霄宮。宗尹旣建討論濫賞之議。士大夫僥倖者爭排之。諸大將楊惟忠劉光世辛企宗兄弟皆嘗從童貫行軍。論者疑其亦當貶。

削同知樞密院事李回亦言宣和間任中書舍人。以校正御前文籍。選官乞削秩罷政。帝曰。宣和政事。恐不必一一皆非。主留意文籍。自是美事。豈可與其他濫賞同科。參知政事秦檜曰。此法一行。濁流者稍加削奪。便比無過之人。誠爲僥倖。清流者少挂吏議。卽爲辱甚大。不敢立朝。恐君子受弊。帝顧諭宗尹。宗尹曰。此事如回者無幾。其它亦不足惜。遂降旨。侍從及館職兼領者罪。又詔武臣濫賞。並免討論。令尙書省榜諭。其日壬子也。命旣下。帝終以爲濫後二日。帝批朕不欲歸過君父。斂怨士夫。可日下寢罷。宗尹堅以爲可行。卽日求去。翼日遂召直龍圖閣新知台州沈與求赴行在。又一日。輔臣進呈。帝曰。天下事不必堅執。至如人主有過。尙許言者。極論若遽沮遏。祇須人不進言。如此則於事有損。始宗尹之建議也。檜力贊之。至是見帝意堅。反以此擠宗尹。又五日。詔驛召呂頤浩。次日遂召翰林學士汪藻。草宗尹免制。曰。日者輕用人言。妄裁官簿。以廟堂之尊。而負天下之謗。以人主之孝。而暴君親之非。朕方丁寧德意。而申命于朝。汝乃廢格詔書。而持必于下。宗尹入相踰一年。始宗尹與辛道宗兄弟往來甚密。帝不樂之。及是遽罷。于是崇觀以來濫賞。悉免討論。但命吏部審量而已。八月乙丑朔。詔奉安天章閣祖宗神御於法濟院。以乘輿播越。神御猶在舟中故也。丙寅。利州觀察使湖東馬步軍副總管孔彥舟爲斬黃鎮撫使。兼知黃州。用張俊奏也。時彥舟在鄂州。舟多糧。富俊恐其盤據要地。故奏用之。拱衛大夫相州防禦使新除舒

斬鎮撫使張用有衆五萬在瑞昌後數日俊親揀其軍精銳者留之老弱者許自便有投曹成者有投岳飛者有投韓世忠者有自去而爲民者俊既并其兵遂以用爲本軍統制乙亥帝諭輔臣曰黨籍至今追贈未畢卿等宜爲朕留意程頤任伯雨龔夬張舜民此四人名德尤著宜卽褒贈乃贈夬直龍圖閣丁丑命右監門衛大將軍士芑附昭慈獻烈皇后神主于溫州太廟哲宗室用太常少卿蘇遲議位在昭懷皇后之上是日韓肖胄題神主罷藏虞主于西夾室帝不視事百官進名奉慰故事虞主瘞于殿後議者以帝方巡幸當竣還闕依故事施行後遂爲例士芑濮王曾孫也留金得歸及是甫至行在戊寅同知樞密院事李回參知政事端明殿學士簽書樞密院事富直柔同知樞密院事庚辰故追復端明殿學士降授奉議郎蘇軾特贈資政殿學士朝奉大夫以其孫宣教郎知蜀州辛巳詔尙書省復置催驅三省房及催驅六曹房范宗尹之相也事多留滯比其罷相制下省吏抱成案就宗尹書押者不可勝計故有是命丁亥參知政事秦檜守尙書右僕射同中書門下平章事兼知樞密院事范宗尹既免相位久虛檜倡言曰我有二策可以聳動天下或問何以不言檜曰今無相不可行也語聞遂有是命（效異）林欽聖朝爲禮部尙書紹興初除參知政事檜曰陛下用臣臣必能聳動天下之士後幸相范宗尹罷帝欲用臣願浩已詔之富直柔韓璘辛道宗永宗皆懼其來密檜檜爲相俾其進乃拜尙書右僕射致諸書皆言檜與直柔爭進故以道宗兄弟爲直柔之黨深疾之其後得政直柔無餘今乃戊子贈張舜民寶文閣直學士程頤任伯雨竝直龍圖閣制曰朕惟周衰聖人之道不

得其傳世之學者違道以趨利捨己以爲人其欲聞仁義道德之說者孰從而聽之間有老師大儒不事章句不習訓傳自得于正心誠意之妙則曲學阿世者又從而排陷之卒使流離顛仆其禍於斯文甚矣爾頤潛心大業無待而興方退居洛陽子弟從之孝弟忠信及進侍帷幄拂心逆旨務引君以當道由其內察其外以所已爲而逆所未爲則高明自得之學可信不疑而浮僞之徒自知其學問文采不足表見於世乃竊其名以自售外示恬默中實奔競外示樸魯中實姦猾外示嚴正中實回僻遂使天下聞其風而疾之是不幸焉爾朕錫以贊書寵以延閣所以振耀褒顯之者以明上之所與在此而不在彼也先是頤子端中知六軍爲盜所殺其孫將仕郎晟在韓世清軍伯雨子承務郎先由建炎初嘗除御營使司主管機宜文字不赴至是詔竝赴行在壬辰詔夏國歷日自今更不頒賜是日吏部員外郎廖綱言古者天子必有親兵實自將之所以備不虞而強主威使無太阿倒持之悔漢北軍唐神策之類是也祖宗軍制尤嚴如三衙四廂所統之兵關防周盡今此軍稍廢所恃以備非常者諸將外衛之兵而已臣願稽舊制選精銳十數萬人以爲親兵直自將之居則以爲衛動則爲中軍此強幹弱支之道最今日急務昔段秀實嘗爲唐德宗言譬猶猛虎所以百獸畏者爪牙也爪牙廢則孤豚特犬皆能爲敵正謂是也願陛下留神毋忽戊戌刑部奏軍士黃德等殺案目其從二人俟于岸次刑寺欲原其死帝曰強盜不分首

從此何用貸。朕居常不敢生嗜物。懼多殺也。此時須當殺以止殺。富直柔曰。物不當死。雖蚤虱可矜。其當死。雖人不可恕。帝甚以爲然。甲辰初。朝廷以張琪邵青反覆爲盜。命諸將毋得招安。而徽猷閣待制知平江府胡松年言。大將四合連旬不能破賊。今青據通州崇明鎮。沙上寨柵之外。水淺舟不可行。泥深人不可涉。本府錢糧已費十三萬貫石。公私騷然。而賊未可睥睨。況劉光世兵將類多西北人。一旦從事江海間。有掉眩不能飲食者。況能與賊較勝負於矢石間哉。先是光世奏已遣統制官王德討青。又奏青窮蹙。朝廷以爲然。及松年有是言。乃令光世措置。後二日。右司諫韓璜亦奏。謂青擁舟數千艘。而朝廷未有舟師制禦。恐轉入海道。驚動浙東。且浙西正當收成之時。青若倏來。必誤國計。又師老費財。或金齊侵江。藉青爲用。凡可慮者五事。疏奏。遂趣光世招降之。辛亥。合祭天地于明堂。太祖太宗並配。赦天下。諸州守臣更不帶節制。管內軍馬免殘破州縣耕牛稅一年。越州人得解舉人。並免將來文解一次。諸路大辟可免奏案。緣道路未通。並聽減等決遣。唐李氏後漢劉氏周郭氏柴氏子孫並各與一班行名目。錄用元符末上書人子孫。應遇兵道棄小人十五歲以下者。聽諸色人收養。卽從其姓。諸盜許一月出首。自新前罪一切勿問。是日以常御殿增築地。步爲明堂。止設天地祖宗四位。其位版朱漆青字。長二尺有五寸。博尺有一寸。厚亦如之。用丑時一刻行事。帝親書明堂及飛白門榜時。未有蒼璧黃琮。禮官引故事。請以木

爲璧。繪天地之色。帝以祀天不當計費。厚價市玉以製之。旣而尺寸不及禮經。乃命有司隨宜置造。禮畢就常御殿外宣赦書。以行宮門前地峻狹故也。是歲內外諸軍犒賜凡一百六萬緡。而戶部椿辦金錢帛三百五萬四千七百餘貫。匹兩皆委官根括於諸路。川陝諸軍則宣撫處置司就以川路助賞物帛給之。自諸軍外。宰執百官並權行住支。以貢賦未集故也。時中書舍人兼直學士院席益草赦文。有曰。上蒼懷悔禍之心。羣策竭定傾之力。六師奏凱。九扈成功。爰舉宗祈。聿修大報。帝以其夸大不悅。壬子。嗣濮王仲湜請合西南外宗正爲一司。以省官吏。事下給舍中書舍人胡交修等言。泉州乏財不許。是時兩外宗子女歸合五百餘人。歲費錢九萬緡。癸丑。鎮南軍節度使開府儀同三司呂頤浩拜少保。尚書左僕射同中書門下平章事。兼知樞密院事。頤浩引故事。辭所遷官。乃以特進就職。甲寅。詔官兩浙錢氏子孫嫡長者一人。以赦書所未及故也。丙辰。呂頤浩言。先平內寇。然後可以禦外侮。今李成摧破。李允文革面。張用招安。李敦仁已敗。江淮惟張琪邵青兩寇。非久必可蕩平。惟閩中之寇不一。又孔彥舟據鄂。馬友據潭。曹成李宏在湘湖江西之閒。而鄧慶龔富剽掠南雄英韶諸郡。賊兵多寡不等。然閩中之寇最急。廣東之寇次之。蓋閩中去行在不遠。二廣未經殘破。若非疾速勦除。爲患不細。詔樞密院措置。丁巳。金房鎮撫使王彥敗李忠。于秦郊。店忠走降劉豫。初曹端旣爲程千秋所殺。忠自稱京西南路副總管。爲端報

仇擾于京西漸犯金州謀入蜀遂申宣撫司乞下洋州關隘照會張浚以爲憂乃遣提舉一行事務閣門宣贊舍人顏孝隆稟議官宣議郎蓋諒馳詣金州以慰撫爲名且以黃敕除忠知商州兼永興軍路總管孝隆至軍中爲所劫以狀白浚言忠實有兵二十餘萬諒規知浚乞爲備浚恐孝隆爲忠所殺委利夔路制置使王庶接收忠入關仍散處其衆于梁洋境內庶檄忠令解甲給隊而入忠去關二十里駐兵回翔月餘無解甲意一夕殺孝隆遁去遂攻金州彥率兵禦之忠沉驚奮戰其下多河北驍果官兵與戰輒不利一日彥遣兵與忠戰于豐里令提舉官趙璜率統領官門章駐于山趾爲之策應彥乘高視之官軍少卻彥麾璜救之不應官軍遂敗彥退舍秦郊忠遂陷諸關彥令將士盡伏山谷間偃旗幟焚積聚若將遁者募死士得千餘人設伏以俟其至戰之前一日彥度忠且入郡城夜半分官軍爲三以遏其衝凌晨果大至官軍逆戰聲震山谷勝負未分俄伏騎張兩翼繞出忠大敗追襲至永興軍之秦嶺會王庶遣偏將鹿晟馮賽來援賽由間道乘之斬其將曹威等三人浚錄其功以彥爲拱衛大夫溫州觀察使賽初除隆德府路經略使自盧氏從邵隆至興元府故庶用之孝隆博州人後贈果州團練使是秋金左副元帥宗翰盡遷邠州居民以其城爲元帥府民之當遷者止許攜籠篋其錢穀器用皆留之右都監耶律伊都至董城西遼主率餘衆北遁伊都以食盡不克窮追而還時盜賊愈多宗翰用大同尹高慶裔計令

竊盜賊一錢以上者皆死雲中有一人拾遺錢于市慶裔立斬之蕭慶知平陽府有行人拔葱于蔬圃亦斬之民知均死由是竊盜少衰而劫盜日盛慶裔又請諸州郡置地牢深三丈分三隅死囚居其下徒流居其中笞杖居其上外起夾城圍以重塹宗翰從而行之宗翰患百姓南歸及四方姦細入境慶裔請禁諸路百姓人數行李以告伍保鄰人次長巷長次所司保明以申州府方給番漢公據以行市肆驗之以鬻飲食客舍驗之以安行李至則繳之于官回則易之以還在路日限一舍違限若不告而出者決沙袋二百仍不許全家出及告出而轉之它處于是人行不以緩急動彌旬日始得就道又所費不貲小商細民坐閭里莫能出入道路寂然幾無人跡矣河東南路兵馬都總管蕭慶招降太行紅巾首領齊實武淵賈敢等送于宗翰盡殺之于獄

續資治通鑑卷第一百九